

Visoki predstavnik naglasio potrebu za poboljšanjem transparentnosti u procesu imenovanja u Ustavni sud

Visoki predstavnik je danas izjavio da je nedavno imenovanje sudija Ustavnog suda naglasilo potrebu za poboljšanjem transparentnosti i standarda koji se primjenjuju pri imenovanju sudija tog Suda.

«Ustavni sud je bio izuzetno uspješan u implementaciji i zaštiti osnovnih vrijednosti utvrđenih u Ustavu BiH. Sud je bio instrument u izgradnji državnih institucija. Ali postoji potreba da se poboljša transparentnost u procesu imenovanja sudija da bi se osigurala politička neutralnost Suda», rekao je visoki predstavnik.

«Previše politizirani proces imenovanja predstavlja rizik od politiziranja cjelokupnog pravosudnog sistema u BiH. Ako se Ustavni sud stavi u ruke političara, a ne pravnih stručnjaka, to može pretvoriti u prah čitavu strukturu vladavine prava», izjavio je visoki predstavnik.

On je konstatirao da je uloga Ustavnog suda od najvećeg značaja u pravosudnom sistemu države jer on predstavlja najvišu sudsku instancu zemlje. Kao takav Sud može vršiti reviziju svih odluka – u građanskim parnicama i krivičnim slučajevima- koje donese bilo koji sud u BiH.

Ustav Bosne i Hercegovine zahtjeva da sudije Suda budu istaknuti pravnici visokog moralnog ugleda. Ali je nedavno visoki predstavnik izjavio da organi vlasti zaduženi za imenovanje sudija – Narodna skupština Republike Srpske i Predstavnički dom Federacije BiH- nisu ove kriterije tumačili na dovoljno rigorozan način.

«Ustavni kriteriji za imenovanje sudija trebaju biti dalje definirani kako bi se osiguralo da kvalifikacije kandidata budu uzete u obzir, a transparentnost procesa koji obavljaju vlasti zadužene za imenovanje treba biti veća», rekao je visoki predstavnik.